

Trefniadau ar gyfer Comisiynu Gwasanaethau – Cyngor Castell-nedd Port Talbot

Blwyddyn archwilio: 2023-24

Dyddiad cyhoeddi: Ionawr 2024

Cyfeirnod y ddogfen: 4731A2025

Paratowyd y ddogfen hon fel rhan o waith a gyflawnir yn unol â swyddogaethau statudol.

Os ceir cais am wybodaeth y gall y ddogfen hon fod yn berthnasol iddo, tynnir sylw at y Cod Ymarfer a gyhoeddwyd o dan adran 45 o Ddeddf Rhyddid Gwybodaeth 2000. Mae cod adran 45 yn nodi'r arfer wrth ymdrin â cheisiadau a ddisgwylir gan awdurdodau cyhoeddus, gan gynnwys ymgynghori â thrydydd partïon perthnasol. O ran y ddogfen hon, mae Archwilydd Cyffredinol Cymru ac Archwilio Cymru yn drydydd partïon perthnasol. Dylid anfon unrhyw ymholiadau ynghylch datgelu neu aildefnyddio'r ddogfen hon at Archwilio Cymru yn swyddog.gwybodaeth@archwilio.cymru.

Rydym yn croesawu gohebiaeth a galwadau ffôn yn Gymraeg a Saesneg. Ni fydd gohebu yn Gymraeg yn arwain at oedi. We welcome correspondence and telephone calls in Welsh and English. Corresponding in Welsh will not lead to delay.

Mae'r ddogfen hon hefyd ar gael yn Gymraeg. This document is also available in English.

Cynnwys

Adroddiad cryno	
Pam y gwnaethom yr archwiliad hwn	4
Ein dyletswyddau archwilio	4
Ein hamcanion ar gyfer yr archwiliad hwn	4
Pam mae comisiynu yn bwysig	4
Yr hyn y gwnaethom ei ystyried a sut mae da yn edrych	5
Ein dulliau archwilio a phryd y gwnaethom gynnal yr archwiliad	5
Yr hyn a ganfuwyd gennym	6
Ein hargymhellion ar gyfer y Cyngor	8
Atodiadau	
Atodiad 1 – cwestiynau a meini prawf archwilio	9

Adroddiad cryno

Pam y gwnaethom yr archwiliad hwn

Ein dyletswyddau archwilio

- 1 Rydym yn cynnal yr archwiliad hwn o dan y dyletswyddau sydd wedi'u cynnwys yn:
 - adran 17 o Ddeddf Archwilio Cyhoeddus (Cymru) 2004 (Deddf 2004) i helpu i alluogi'r Archwilydd Cyffredinol i fod yn fodlon (neu beidio) bod y Cyngor wedi rhoi trefniadau priodol ar waith i sicrhau gwerth am arian wrth ddefnyddio ei adnoddau;
 - adran 15 o Ddeddf Llesiant Cenedlaethau'r Dyfodol (Cymru) 2015 i helpu i alluogi'r Archwilydd Cyffredinol i asesu i ba raddau y mae'r Cyngor yn gweithredu yn unol â'r egwyddor datblygu cynaliadwy wrth gymryd camau i gyflawni ei amcanion llesiant.
- 2 Gall yr archwiliad hwn hefyd lywio astudiaeth ar gyfer gwella gwerth am arian o dan adran 41 o Ddeddf 2004.

Ein hamcanion ar gyfer yr archwiliad hwn

- 3 Ein hamcanion ar gyfer yr archwiliad hwn yw:
 - rhoi sicrwydd bod gan gynghorau drefniadau priodol ar gyfer comisiynu gwasanaethau er mwyn sicrhau gwerth am arian wrth ddefnyddio adnoddau.
 - rhoi sicrwydd bod cynghorau'n gweithredu yn unol â'r egwyddor datblygu cynaliadwy wrth gomisiynu gwasanaethau.
 - esbonio sut mae cynghorau'n mynd ati i gomisiynu gwasanaethau ac ysbrydoli a grymuso cynghorau a chyrrff eraill yn y sector cyhoeddus drwy nodi a rhannu enghreifftiau o arferion/dulliau nodedig lle bo hynny'n berthnasol.
- 4 Rydym yn cynnal yr archwiliad hwn ym mhob un o'r 22 o brif gynghorau yng Nghymru.

Pam mae comisiynu yn bwysig

- 5 Comisiynu yw'r broses y mae'r Cyngor yn ei defnyddio i ddylunio gwasanaethau y mae'n bwriadu eu darparu. Mae'n dechrau trwy ddiffinio'r gwasanaeth a'r allbynnau a'r canlyniadau a ddymunir ac yn gorffen pan fydd y Cyngor yn trefnu ei ddull cyflawni. Er enghraifft, drwy sefydlu tîm cyflawni yn fewnol, neu drwy gaffael cyflenwr allanol.
- 6 Gall trefniadau comisiynu helpu i sicrhau bod gwasanaethau'n cael eu darparu'n ddarbodus, yn effeithlon ac yn effeithiol. I'r gwrthwyneb, gall gwendidau mewn trefniadau comisiynu leihau effaith a gwerth am arian gwasanaethau, hyd yn oed os yw'r prosesau sy'n dilyn, fel caffael a rheoli contractau, yn gadarn.



Yr hyn y gwnaethom ei ystyried a sut mae da yn edrych¹

- 7 Gwnaethom adolygu trefniadau'r Cyngor ar gyfer comisiynu gwasanaethau, ac yn benodol i ba raddau y datblygwyd hyn yn unol â'r egwyddor datblygu cynaliadwy; ac i ba raddau y bydd yn helpu i sicrhau gwerth am arian wrth ddefnyddio adnoddau'r Cyngor.
- 8 Nid oedd yr archwiliad hwn yn cynnwys trefniadau caffael na threfniadau rheoli contractau'r Cyngor.
- 9 Roedd yr archwiliad yn ceisio ateb y cwestiwn cyffredinol: **Wrth gomisiynu gwasanaethau, a yw'r Cyngor yn rhoi trefniadau priodol ar waith i sicrhau gwerth am arian wrth ddefnyddio ei adnoddau?**
- 10 Gwnaethom ddefnyddio'r meini prawf archwilio a nodir yn Atodiad 1, sydd hefyd yn dangos sut mae'r meini prawf yn cysylltu â'r cwestiynau archwilio. Llywiwyd hyn gan ein gwybodaeth gronol yn ogystal â'r hierarchaeth gwestiynau a'r dangosyddion cadarnhaol a ddatblygwyd gennym i gefnogi ein harchwiliadau Egwyddor Datblygu Cynaliadwy.



Ein dulliau archwilio a phryd y gwnaethom gynnal yr archwiliad

- 11 Mae ein canfyddiadau yn seiliedig ar adolygiadau o ddogfennau, a chyfweliadau gyda'r uwch swyddog(ion) sy'n gyfrifol am ddatblygu dull strategol y Cyngor o gomisiynu. Fe wnaethom hefyd gyfweled ag uwch swyddogion sy'n gyfrifol am wasanaethau y mae'r Cyngor wedi'u comisiynu'n allanol.
- 12 O ystyried yr amrywiaeth eang o wasanaethau a ddarperir gan y Cyngor, gwnaethom gynnal profion sampl o'r trefniadau y mae'r Cyngor wedi'u rhoi ar waith i gomisiynu gwasanaethau. I wneud hyn, gwnaethom ddewis sawl gwasanaeth y mae'r Cyngor wedi penderfynu comisiynu gwasanaethau'n allanol ar eu cyfer ac archwilio'r trefniadau comisiynu y mae'r Cyngor wedi'u rhoi ar waith. Y sampl o wasanaethau a gomisiynir a adolygwyd gennym yn y Cyngor oedd:
 - Fframwaith ar gyfer dod o hyd i weithwyr asiantaeth.
 - System rheoli gwybodaeth gwasanaethau cymdeithasol.
 - Rheoli Gwastraff y Cartref a Chanolfannau Ailgylchu.
- 13 Mae'r dystiolaeth a ddefnyddiwyd gennym i lywio ein canfyddiadau wedi'i chyfyngu i'r ffynonellau hyn. Mae ein canfyddiadau'n canolbwyntio ar ddull strategol

¹ Diffinnir fel 'yr hyn a ddylai fod' yn unol â deddfau neu reoliadau, 'yr hyn a ddisgwylir' yn ôl arferion gorau, neu 'yr hyn a allai fod', o dan amodau gwell.

cyffredinol y Cyngor o gomisiynu gwasanaethau. Gwnaethom ymgymryd â'r gwaith hwn yn ystod mis Medi a mis Hydref 2024.

- 14 Rydym yn ymgymryd â'r gwaith hwn ym mhob un o'r 22 o brif gynghorau yng Nghymru ac, yn ogystal ag adrodd yn lleol i bob cyngor, rydym hefyd yn bwriadu llunio adroddiad cenedlaethol.



Yr hyn a ganfuwyd gennym

- 15 **Yn gyffredinol, canfuom nad oes gan y Cyngor drefniadau clir ar waith i sicrhau gwerth am arian yn gyson wrth gomisiynu gwasanaethau ond ei fod yn cryfhau ei ddull gweithredu.** Nodwn isod pam y daethom i'r casgliad hwn.
- 16 Mae gan y Cyngor sail resymegol glir dros y gwasanaethau y mae'n eu comisiynu ond nid yw bob amser yn cynnal arfarniad cynhwysfawr o ddewisiadau comisiynu. Er enghraifft, o'r tri gwasanaeth a adolygwyd gennym, dim ond un oedd yn gallu dangos bod dadansoddiad cynhwysfawr o ddewisiadau wedi'i gynnal. Yn yr achos hwn, defnyddiodd y Cyngor arbenigedd allanol i gefnogi ei asesiad o ddewisiadau a chynhaliodd waith ymgysylltu â defnyddwyr, dadansoddi risg ac asesu costau gweithredu. O'r ddau wasanaeth arall a ystyriwyd gennym, nid oedd un yn ystyried dewisiadau ac roedd y llall yn ystyried dewisiadau cyfyngedig drwy drafodaethau anffurfiol rhwng swyddogion. Mae hyn yn golygu, ar adeg ein hadolygiad, nad oedd gan y Cyngor drefniadau corfforaethol ar waith i sicrhau bod adrannau'n ystyried amrywiaeth o ddewisiadau yn gyson wrth gomisiynu gwasanaethau.
- 17 Fodd bynnag, mae'r Cyngor yn cryfhau ei drefniadau i annog adrannau i ystyried amrywiaeth o ddewisiadau pan mae gwasanaethau'n cael eu comisiynu. Er enghraifft, mae ei ddogfen strategaeth dendro a ddiweddarwyd yn ddiweddar yn annog adrannau i ystyried dewisiadau eraill, llwybrau caffael eraill a chyfleoedd i gydweithio â chyrrff eraill. Mae cael dealltwriaeth glir o pam mae gwasanaethau'n cael eu comisiynu, yr hyn y bwriedir iddynt ei gyflawni, a'r gwahanol ddewisiadau sydd ar gael yn elfennau pwysig o drefniadau i sicrhau gwerth am arian.
- 18 Mae'r Cyngor yn cynllunio dros amserlenni priodol wrth gomisiynu gwasanaethau ond nid yw bob amser yn ystyried sut y bydd gwerth am arian yn cael ei sicrhau yn y tymor hir. Er enghraifft, mynegodd swyddogion sut mae'r Cyngor yn ystyried hyd contractau a'r cydbwysedd rhwng sefydlogrwydd a hyblygrwydd wrth gomisiynu gwasanaethau. Fodd bynnag, o ran y gwasanaethau a adolygwyd gennym, nid oedd y Cyngor wedi asesu'n glir effaith senarios cyllideb yn y dyfodol ar y gwasanaethau a gomisiynwyd. Mae asesu dewisiadau comisiynu yn erbyn senarios cyllideb yn y dyfodol yn bwysig er mwyn deall a fydd y dewis yn sicrhau gwerth am arian yn y tymor hir. Mae hyn yn arbennig o bwysig yng nghyd-destun

sefyllfa ariannol y Cyngor, gyda bwlch cyllidebol o tua £39 miliwn wedi'i nodi dros y tymor canolig².

- 19 Nid yw'r Cyngor bob amser yn ystyried effeithiau ehangach ei weithgarwch comisiynu. Mae'r Cyngor yn dibynnu ar ei drefniadau asesu effaith i gefnogi gwasanaethau wrth ystyried effeithiau ehangach, gan gynnwys ei amcanion llesiant ei hun a rhai cyrff eraill y sector cyhoeddus, y nodau llesiant cenedlaethol a'r effeithiau ar bobl sydd â nodweddion gwarchoddedig. Fodd bynnag, yn unol â phroses asesu effaith dau gam y Cyngor, nid oes angen asesiadau effaith llawn ar gyfer pob penderfyniad comisiynu, ac roedd hyn yn wir o ran dau o'r tri gwasanaeth a adolygwyd gennym. Gan nad oes gan y Cyngor drefniadau eraill ar waith i annog gwasanaethau i ystyried effeithiau ehangach eu penderfyniadau comisiynu, mae'r Cyngor yn wynebu'r risg o golli cyfleoedd i osgoi dyblygu, nodi manteision amryfal a sicrhau gwerth am arian.
- 20 Yn gyffredinol, mae'r Cyngor yn gweithio gyda'r bobl a'r partneriaid cywir i ddylunio a darparu'r gwasanaethau a gomisiynir ganddo. Canfuwyd tystiolaeth bod y Cyngor yn cynnwys pobl ac yn ystyried cydweithio â phartneriaid wrth gomisiynu gwasanaethau. Er enghraifft, roedd un o'r gwasanaethau a adolygwyd gennym wedi cynnal ymarfer ymgysylltu manwl i ddeall gofynion defnyddwyr. Roedd gwasanaeth arall wedi archwilio dewisiadau cydweithredu gydag awdurdodau cyfagos. Gall gweithio gyda'r bobl a'r partneriaid cywir helpu'r Cyngor i sicrhau ei fod yn comisiynu gwasanaethau sy'n diwallu anghenion ei gymunedau, a bod y gwasanaethau hynny'n cael eu darparu mewn ffordd sy'n sicrhau'r gwerth mwyaf am arian.
- 21 Nid yw'r Cyngor yn ystyried sut y bydd yn monitro gwerth am arian wrth gomisiynu gwasanaethau. Er bod y tri gwasanaeth a adolygwyd gennym wedi nodi canlyniadau ac roedd trefniadau monitro contractau ar waith, nid oedd y Cyngor wedi diffinio'n glir sut y byddai gwerth am arian yn cael ei fonitro dros y tymor hir. Er enghraifft, ni welsom dystiolaeth o drefniadau corfforaethol a oedd yn annog gwasanaethau i nodi sut y byddant yn asesu a yw'r dull a ddewiswyd yn parhau i ddefnyddio adnoddau yn y ffordd fwyaf effeithiol. Mae hyn yn ei gwneud hi'n anodd i'r Cyngor gael sicrwydd bod gwerth am arian wedi'i sicrhau drwy'r gwasanaethau a gomisiynwyd ganddo. Mae'r Cyngor yn datblygu ei drefniadau i sicrhau a gwerthuso gwerth am arian ei ddull o gomisiynu gwasanaethau drwy ei Strategaeth Gaffael 2024-2028. Fodd bynnag, nid oedd y trefniadau hyn ar waith ar adeg ein hadolygiad.
- 22 Nid yw'r Cyngor bob amser yn gwerthuso gwerth am arian cyffredinol ei drefniadau comisiynu. Nid oedd unrhyw un o'r gwasanaethau a adolygwyd gennym wedi'u hannog i nodi'r gwersi a ddysgwyd o weithgarwch comisiynu yn ffurfiol. Mae hyn yn lleihau gallu'r Cyngor i ddysgu o brofiadau comisiynu, deall yr amgylchedd y mae gwasanaethau wedi gwneud penderfyniadau comisiynu ynddo a sicrhau ei hun bod

² [Cyngor Castell-nedd Port Talbot – Adolygiad o Gynaliadwyedd Ariannol | Archwilio Cymru](#)

penderfyniadau wedi'u gwneud yn briodol. Mae gwerthuso cost ac effeithiolrwydd trefniadau comisiynu yn bwysig er mwyn helpu i nodi meysydd i'w gwella, rhannu dysgu yn fewnol a gyda phartneriaid a sicrhau gwerth am arian.

Ein hargymhellion ar gyfer y Cyngor

Arddangosyn 1: ein hargymhellion ar gyfer y Cyngor

Argymhellion

- A1 Er mwyn cryfhau ei drefniadau i sicrhau gwerth am arian wrth gomisiynu gwasanaethau, dylai'r Cyngor:
- 1.1 rhoi trefniadau ar waith i sicrhau bod arfarniadau o ddewisiadau yn cael eu cynnal yn gyson fel rhan o benderfyniadau comisiynu;
 - 1.2 rhoi trefniadau ar waith i sicrhau bod effeithiau ehangach, gan gynnwys cyfleoedd i gyflawni manteision amryfal a lleihau dyblygu, yn cael eu hystyried yn gyson ar gyfer yr holl wasanaethau a gomisiynir.
- A2 Er mwyn helpu'r Cyngor i ddangos a yw gwasanaethau a gomisiynwyd wedi sicrhau gwerth am arian, dylai'r Cyngor:
- 2.1 rhoi trefniadau ar waith i werthuso gwerth am arian yr holl wasanaethau a gomisiynwyd, gan gynnwys nodi'r gwersi a ddysgwyd;
 - 2.2 monitro i ba raddau y cydymffurfir â threfniadau comisiynu.

Atodiad 1

Cwestiynau a meini prawf archwilio

Cwestiwn cyffredinol: Wrth gomisiynu gwasanaethau, a yw'r Cyngor yn rhoi trefniadau priodol ar waith i sicrhau gwerth am arian wrth ddefnyddio ei adnoddau?

Cwestiwn Lefel 2	Cwestiynau Lefel 3	Meini prawf
A oes gan y Cyngor sail resymegol glir dros gomisiynu gwasanaethau?	A yw'r Cyngor yn diffinio'n glir y gwasanaethau y mae'n bwriadu eu comisiynu a pham?	<ul style="list-style-type: none">• Mae'r Cyngor yn nodi diffiniad clir o'r gwasanaethau y mae'n bwriadu eu comisiynu• Mae'r Cyngor yn nodi 'pam' mae angen iddo gomisiynu'r gwasanaethau gan gynnwys:<ul style="list-style-type: none">– y canlyniadau/effaith a fwriedir wrth ddarparu'r gwasanaeth– os/sut mae'r gwasanaeth yn helpu'r Cyngor i gyflawni ei ddyletswyddau statudol
	A yw'r Cyngor yn cynnal gwerthusiad cynhwysfawr o ddewisiadau comisiynu cyn penderfynu comisiynu gwasanaeth?	<ul style="list-style-type: none">• Mae'r Cyngor yn ystyried yr amrywiaeth lawn o ddewisiadau comisiynu ar gyfer darparu'r gwasanaeth – gallai'r dewisiadau gynnwys, er enghraifft:<ul style="list-style-type: none">– darpariaeth fewnol,– trefniadau partneriaeth neu ddulliau o gomisiynu o fewn ac ar draws sectorau– allanoli'r gwasanaeth i ddarparwr arall drwy ymddiriedolaeth neu drefniant arall– contractio'r gwasanaeth drwy broses dendro• Mae'r Cyngor yn ystyried costau a manteision y dewisiadau o safbwynt darbodaeth, effeithlonrwydd ac effeithiolrwydd – gan gynnwys dros y tymor byr, canolig a hir• Mae'r Cyngor yn cynnwys costau rheoli contractau o fewn ei asesiad o ddewisiadau comisiynu• Mae'r Cyngor yn cynnwys asesiad o risg ar gyfer pob dewis comisiynu fel rhan o'r asesiad o gostau a manteision• Mae'r Cyngor yn defnyddio amrywiaeth eang o wybodaeth o ffynonellau mewnol ac allanol i

		ddatblygu dealltwriaeth o'r ffactorau presennol a hirdymor sy'n debygol o effeithio ar wasanaethau a gomisiynir
A yw'r Cyngor yn cynllunio dros amserlen briodol?	A yw'r Cyngor yn ystyried beth mae tymor hir yn ei olygu wrth gomisiynu gwasanaethau?	<ul style="list-style-type: none"> • Mae'r Cyngor yn ystyried beth mae tymor hir yn ei olygu wrth gynllunio ei ddull o gomisiynu gwasanaethau – h.y. pa mor bell ymlaen y gall / y dylai gynllunio a pham. • Mae'r Cyngor yn ystyried sut y bydd yn cydbwysu anghenion tymor byr a thymor hir wrth gynllunio comisiynu gwasanaethau, gan gynnwys, er enghraifft, wrth bennu'r amserlen ar gyfer contractau neu drefniadau comisiynu eraill
	A yw'r Cyngor yn deall goblygiadau tymor hir o ran adnoddau wrth gomisiynu gwasanaethau?	<ul style="list-style-type: none"> • Mae'r Cyngor yn meddwl am yr adnoddau y bydd eu hangen arno dros y tymor canolig a'r tymor hwy (costau oes gyfan) i ddarparu gwasanaethau a gomisiynir • Mae'r Cyngor yn ystyried sut y gellid gweithredu amrywiaeth o senarios lleihau cyllideb yn y dyfodol i wasanaethau a gomisiynir.
	A yw'r Cyngor yn nodi sut y bydd yn monitro gwerth am arian gwasanaethau a gomisiynir dros y tymor byr, canolig a hir?	<ul style="list-style-type: none"> • Mae'r Cyngor yn nodi'r trefniadau monitro y bydd yn eu dilyn ar gyfer y gwasanaeth a gomisiynir • Dylai'r Cyngor nodi sut y bydd gwerth am arian gwasanaethau a gomisiynir yn cael ei asesu a'i fonitro gan gynnwys: <ul style="list-style-type: none"> – costau a manteision; – cynnydd tuag at gerrig milltir a mesurau tymor byr, canolig a hwy
A yw'r Cyngor wedi meddwl am yr effeithiau ehangach y gallai'r gwasanaeth a gomisiynir ganddo eu cael?	Wrth gomisiynu gwasanaethau, a yw'r Cyngor yn ystyried sut y gall wneud y cyfraniad mwyaf posibl at amcanion llesiant y Cyngor?	<ul style="list-style-type: none"> • Mae'r Cyngor yn ystyried sut y bydd gwasanaethau a gomisiynir yn effeithio ar ei holl amcanion llesiant ei hun i sicrhau manteision amryfal, osgoi dyblygu neu unrhyw ganlyniadau anfwriadol. Er enghraifft, ystyried amcanion tymor hwy, cadwyn gyflenwi leol, cydnerthedd y farchnad ac effaith hyd amser contract, bioamrywiaeth, lleihau carbon
	Wrth gomisiynu gwasanaethau, a yw'r Cyngor yn ystyried sut y gall	<ul style="list-style-type: none"> • Mae'r Cyngor yn ystyried sut y bydd gwasanaethau a gomisiynir yn effeithio ar amcanion llesiant cyrff

	<p>gwasanaethau wneud y cyfraniad mwyaf posibl at amcanion llesiant cyrff sector cyhoeddus eraill?</p>	<p>eraill y sector cyhoeddus i sicrhau manteision amryfal ac osgoi dyblygu neu unrhyw ganlyniadau anfwriadol</p>
	<p>Wrth gomisiynu gwasanaethau, a yw'r Cyngor yn ystyried sut y gall gwasanaethau wneud y cyfraniad mwyaf posibl at y Nodau Llesiant Cenedlaethol?</p>	<ul style="list-style-type: none"> • Mae'r Cyngor yn ystyried sut y bydd gwasanaethau a gomisiynir yn effeithio ar y nodau llesiant cenedlaethol i sicrhau manteision amryfal ac osgoi dyblygu neu unrhyw ganlyniadau anfwriadol
<p>A yw'r Cyngor yn gweithio gyda'r bobl a'r partneriaid cywir i ddylunio a darparu'r gwasanaethau a gomisiynir ganddo?</p>	<p>A yw'r Cyngor wedi nodi pwy sydd angen ei gynnwys?</p>	<ul style="list-style-type: none"> • Mae'r Cyngor yn deall pwy fydd y gwasanaethau a gomisiynir yn effeithio arnynt yn uniongyrchol ac yn anuniongyrchol. Mae hyn wedi cael ei lywio gan ddadansoddiad rhanddeiliaid neu debyg.
	<p>A yw'r Cyngor yn cynnwys yr amrywiaeth lawn o bobl?</p>	<ul style="list-style-type: none"> • Mae'r Cyngor yn cynnwys yr amrywiaeth lawn o safbwyntiau wrth benderfynu sut i gomisiynu gwasanaethau. • Mae'r Cyngor yn defnyddio canlyniadau gweithgarwch cyfranogi i lywio sut y bydd yn comisiynu gwasanaethau, gan gynnwys ei effaith ar grwpiau sy'n rhannu nodweddion gwarchoddedig
	<p>A yw'r Cyngor yn cydweithio â'r partneriaid cywir?</p>	<ul style="list-style-type: none"> • Mae gan y Cyngor ddealltwriaeth dda o ba bartneriaid a phartneriaid posibl y gallai weithio gyda nhw i gomisiynu gwasanaethau i wella gwerth am arian. Mae hyn wedi'i lywio gan ddadansoddiad cynhwysfawr o bartneriaid posibl a'u blaenoriaethau. • Lle nodir cyfleoedd i wella gwerth am arian drwy gomisiynu gwasanaethau mewn partneriaeth, mae'r Cyngor yn eu dilyn.
<p>A oes gan y Cyngor drefniadau ar waith i werthuso gwerth am arian ei dull comisiynu?</p>	<p>A yw'r Cyngor yn gwerthuso effeithiolrwydd trefniadau comisiynu fel mater o drefn?</p>	<ul style="list-style-type: none"> • Mae'r Cyngor yn adolygu effeithiolrwydd ei ddull o gomisiynu yn rheolaidd, gan gynnwys: <ul style="list-style-type: none"> – I ba raddau y mae gwasanaethau a gomisiynir yn cyflawni'r amcanion y mae'r Cyngor wedi'u gosod – Gwerth am arian modelau comisiynu a ddewiswyd gan gynnwys ystyried mewnbynnau, allbynnau a chanlyniadau.

A yw'r Cyngor yn rhannu unrhyw wersi a ddysgwyd fel mater o drefn er mwyn llywio ymarferion comisiynu yn y dyfodol?

- Mae'r Cyngor yn rhannu ac yn cymhwyso unrhyw wersi a ddysgwyd o'i ddull o gomisiynu yn eang ar draws y sefydliad, a gyda phartneriaid lle bo hynny'n berthnasol.
-



Archwilio Cymru

1 Cwr y Ddinas

Caerdydd CF10 4BZ

Ffôn: 029 2032 0500

Ffacs: 029 2032 0600

Ffôn testun: 029 2032 0660

E-bost: post@archwilio.cymru

Gwefan: www.archwilio.wales

Rydym yn croesawu gohebiaeth a galwadau ffôn yn Gymraeg a Saesneg.
We welcome correspondence and telephone calls in Welsh and English.